


TRACT 5





Digitized by the Internet Archive
in 2019 with funding from
Wellcome Library

<https://archive.org/details/b30774883>

ERHARDI REVSCHII
DISQVISITIO
DE
M.T.CICERONIS
PARTITIONIBVS
ORATORIIIS.

ADIUNCTA EST
ORATIO
QVA
VETERVM ELOQVENTIA,
HVIVSQVE
ADDISCENDAE RATIO,
AB
IISDEM DICENDI MAGISTRIS TRADITA,
COMMENDATVR.

HELMAESTADII,
EX OFFICINA PAVLI DIETERICI SCHNORRII,
ACAD. TYPOGR.
ANNO MDCCCXXIII.

ERHARDI REYSCHE

MDCCCXXXIII

DE

M. T. CICERO
PARTITIONIBUS
ORATORIS.

AD ALEXANDER

ORATIO

DE

VETERUM ELOGVENTIA.

UNIVERSAE

ADDISCENDAE LATINAE.

AB

IBIDEM DICENDI MAGISTRIS TRADITA.

COMPOSITA

HELMSTADT

EX OFFICINA PAULI DIERICHI SCHNEIDER

ALAB. TROGER

ANNO MDCCCXXXIII

ILLVSTRISSIMIS EXCELLENTISSIMISQVE
VIRIS
ANDREAE GOTTLIEB
A BERNSTORF

DYNASTAE CLIENTELARVM BERNSTORF,
VEHDENDORF ET REL.
S. REGIAE MAGNAE BRITANNIAE MAIESTATIS
ATQVE
ELECTORIS BRVNSVICENSIS ET LVNEBVRGENSIS
IN TERRIS IPSIVS GERMANICIS

PRIMO ADMINISTRO,
ET
VRBANO DIETERICO
A LVEDEKE,

DYNASTAE CLIENTELAE
NIEDERNSIKTE,
SERENISSIMI DVCIS BRVNSVICENSIVM
ET LVNEBVRGENSIVM

PRIMO STATUS MINISTRO,
CANCELLARIO ET CONSISTORII
DIRECTORI,

MAECENATIBVS DEMISSE COLENDIS,
VITAM LONGAM, SANAM, FELICEM
PRECATVR

ERHARDVS REVSCH.

WILHELMUS CAROLUS

VIRIS

ANDREAE GOTTLIEB

A BENNIG

DYNASTAE CLIENTELAE BENNIG

WILHELMUS CAROLUS

2 REGIAE MAGNAE BRITANNIAE MAJESTATIS

ALIA

ELICITIS BENNIG

WILHELMUS CAROLUS

PRIMO ADMINISTRO

ET

FRANCO DIETICO

A LAVEN

DYNASTAE CLIENTELAE

WILHELMUS CAROLUS

SERENISSIMI DUCIS BRUNSVICENSIS

ET LUNEBURGENSIS

PRIMO STATUS MINISTRO

CANCELLARIO ET COMISSARIO

DIRECTORI

MAGISTRATUS DEMARCE COMITIS

WILHELMUS CAROLUS

ALIA

ERHARDUS REISSER

O *Efero VOBIS, VIRI ILLUSTRISSIMI
EXCELLENTISSIMIQUE, primum,
quod in illustri Academia Iulia
natum est, dictionis, fortasse neque per-
fectae satis, neque perpolitae, specimen,
quod VOBIS potius, quam alteri cuiquam,
a me multis nominibus deberi, intelligo.
Ut enim augustus Britanniarum Rex,
GEORGIUS, itemque potentissimus
Guelphorum Dux, AVGVSTVS
VVILHELMVS, Principes pii, iusti,
felices, Iuliae suae Nutricii longe in-
dulgentissimi, benignissimi, qui optima-
rum artium cultores, ubicunque terra-
rum agant, munificentissime foveant, de
mea bene de re literaria merendi volun-
tate non male sentirent, Vestra potissi-
mum auctoritate inducti sunt. Indeque
factum est, ut nuper admodum, quam
nunc sustineo, docendi provinciam mihi
clementissime committerent, qui dicendi
artem, sane praestantissimam, profite-
rer, bonasque juvenum mentes ad oratio-
nis*

nis cultum et liberalioris doctrinae studia informarem. Pietas itaque et mentis gratae memoria admonet, ut, quod jure quodam Vestro a me reposcitis, et Vestrae erga me benignitatis, tot argumentis exploratae, et meae erga Vos observantiae demissae monumentum publice exstaret. Accedit mirabilis illa Vestra et inusitata comitas, atque perspectissima gratia, qua tum patriam, tum bonos omnes, complecti dignamini. Nam cum praeclara quotidie opera, eademque et multitudine infinita, et sapientia immensa, pro patriae salute suscipiatis; eorum laudes immortales grata praedicabit posteritas, quum incredibilem civium amorem, in quo solo conquiescitis, et exterorum admirationem jam tum nostris temporibus excitasse constet. Quibus tandem laudum praeconiis in caelum usque extollet testatam eam curam, quam occupationum et negotiorum gravissimorum mole paene obruti, tamen
inde-

indefessi, exemplo nostra aetate inaudito, agitis, ut artium disciplinarumque mysteria quam castissime tradantur venturi saeculi progeniei? persuasi, ita demum futurum, ut, quod unice speramus ac vovemus, posterius quoque habeant rempublicam, quae fortunata sit, felix et beata. Quapropter usu diuturno et experientia edocti, bene ac sapienter iudicatis, quemadmodum artibus honestissimis in republica, sua constat utilitas, suum pretium; ita longe maximam esse praestantiam eloquentiae, quae una reliquas omnes illuminat, quarum simul opes, dum suas promit et explicat, humano generi commendabiliore offerit, quaeque alii ob asperitatem detestantur et fugiunt, sua suavitate ita contemperat, ut vel inviti in animos demittant monita salutaria, et dicto audientes se praebeant. Politissimis istis humanitatis ac literarum reconditarum studiis quum, praeter ceteros, egregie instructos atque ornatos
mi-

mirentur summi et infimi, ad Vos praeci-
pue, MAXIMI MAECENATES, recta contendere
debebat hoc quaecunque dictionis expe-
rimentum, quod illustrissimis Vestris No-
minibus eo majori fiducia consecro, et
in clientelam trado, partim ut Vestris
auspiciis charius appareat et acceptius,
partim ut testis sit apud Vos memoris
animi, et pignus perpetuae meae venera-
tionis grataeque voluntatis. Neque ulla
animo dubitationis suspicio residet, quin
faciles aditus, quos pro humanitate, VOBIS
propria, mihi prolixissime concessistis,
his quoque literulis indulgeatis. Quod
superest, DEVM O. M. curatis precibus ve-
neror, ut diutissime et felicissime viven-
do longe superetis gloriam, quam in or-
be terrarum prolixa in omnes gratiae
ac benevolentiae significatio, et virtus
tantis heroibus digna, VOBIS conciliavit.
Valete, MAECENATES OPTIMI. DEVS VOS
salvos atque incolumes usque conservet.
Helmaestadii, m. Nov. MDCCXXIII.

ERHARDI REVSCHI
DISQVISITIO
DE
M. T. C I C E R O N I S
P A R T I T I O N I B V S
O R A T O R I I S.
A D
HUMANITATIS MELIORVMQVE
L I T E R A R V M
IN ACADEMIA IVLIA
C V L T O R E S.



Rti doctrinaeque dicendi maxima incrementa fuisse a M. Cicerone, quanquam longe meliore oratore, quam rhetore, non inconvenienter judicat GER. IO. VOSSIVS de constit. rhetor. c. 13. Is enim non modo Plotium, M. Catonem Censorium, M. Antonium,

et si qui praeterea inter Latinos hanc artem literis ante ipsum mandavere, longo intervallo post se reliquit; sed et praestantissimis Graecorum se aequiparavit. Nam cum dissentirent inter se veteres in tradenda nobilissima hac disciplina; in ea rerum difficultate Tullius lucem eidem affudit, multa, quae illam mirifice adjuvant et illustrent, perscripsit, eandemque, obscuram alias, adeo clare, perspicue, solide declaravit, ut jure dubites, utrum a quocumque facta sit illustrior. Videri quidem posset, Vossium poenituisse elogii, et de eodem quid de-

tractum velle, dum *longe meliorem oratorem fuisse, quam rhetorem*, perhibet. Sed cave, haec verba ad contemptum Tullii pertinere existimes. Nunquam certe me adduci patior, ut credam, Vossium extenuare verbis voluisse, quae sunt praestantissima. Nollem enim insimulare virum, acri iudicio multaque rerum cognitione praeditum, non modo non cohaerentia inter se dixisse, sed maxime disjuncta atque contraria. Eam potius mentem viri eruditissimi, eum sensum esse verborum, mihi persuadeo: Ciceronem, qui perfectissimus sit rhetor, dicendo tamen se ipsum superasse, et oratorem fuisse se ipso meliorem. Nec dubito, quin in animo habuerit, quod redargueret, Carneadis effatum, qui apud nostrum *lib. I. de orat.* temere satis asseruit, *neminem scriptorem artis ne mediocriter quidem disertum fuisse*. Nisi itaque jam aliunde compertum haberemus, qua artis praestantia enituerit Cicero; nunc saltem, Vossii iudicio, liquido constaret, optimis eum rhetoribus annumerandum esse. Ex libris, quorum plurimis huic arti adjumentum subministravit, PARTITIONES ORATORIAS ab omnibus laudari animadverto; de quo libello utilissimo pleraque, quae generatim de eo et universe dici possunt, hoc loco colligam, ut ad ejus lectionem scriptio haec viam et aditum parare queat.

Tullium partitionum oratoriarum esse auctorem, nemo adhuc inficias ire sustinuit, praeter ANGE-
LUM DECEMBRIUM, qui *lib. I. de politia literaria part. 10*, illas Ciceroni, levi conjectura adductus,
ctus,

ctus, abjudicare conatur, eo quod nullam earum mentionem fecerit in reliquis, quae ad nos devenere, scriptis suis. Verba Angeli hic legisse juvabit: est enim liber Augustae Vindelicorum apud Henricum Steynerum a. 1541. fol. typis excusus, et Basileae 1562. f. 8. recus, in paucorum manibus: *Idem de partitionibus rhetoricis ad filium, ut arbitramini, a me dictum intelligatis, quod opus est dissimulantis speciem prae se ferentis: est enim apud Tullium ingeniosa quaedam, nec reprehendenda, sui ipsius gloriandi consuetudo, ut in singulis fere ejus operibus, aliorum, quae scripserit, mentio sentiatur, qua paene omnia cognoscimus, quae ab ipso sunt edita.* Temerarium certe videtur, ob hanc solam ratiunculam isti libro ingenuitatis jura disputare velle. Sunt enim alii adhuc libri Ciceronis, qui suum inter genuinos locum tuentur, licet illorum mentionem alibi non fecerit. Sed quia neminem invenit subscriptorem adprobatoresque sententiae suae; non est, cur de ea convellenda, aut de rationibus conquirendis, quibus Ciceronis foetum esse adseritur, amplius solliciti simus, maxime cum acerrimi librorum aestimatores, et emunctae naris arbitri, stylum Ciceronianum in eo agnoscant.

Quo aetatis anno perscriptae fuerint partitiones? pro certo definiri non potest. IOANNI STURMIO, celebri Argentinenfis Academiae rectori, qui Grajae
librariae unus instar atque Romanae est

Ciceroniano Sturmius potens ore,
 credibile videtur, eum post C. Caesaris victoriam,

profligatis Pompejanis, cum Cicero a reipublicae negotiis se abduceret, doctrinaeque studio et instituendae juventuti operam impendere suam, eamque docere coepisset dicendi artem, has etiam artis partitiones composuisse. In haec ergo tempora ut paulo curatius inquiramus, fas erit. Pompejus acie pharsalica succubuit A. V. C. 1555, qui est annus aetatis Tullii nonus supra quinquagesimum. Deinde nulla mora interposita, belli reliquias persequebatur Caesar in Aegypto: neque illud ante annum V. C. 1557 confecit, Caesare tertium et Lepido Coss. Hoc eodem anno, quum Iulius esset in Aegypto, Cicero Romae commorabatur, neque Roma fere exhibat, propter varias hominum suspiciones, de quibus apud Varronem conqueritur *epist. 2 lib. VIII ad divers.* Nec multo post ab urbe secedens, aliquandiu ruri in villis latitavit, et sub Caesaris ex Africano bello adventum in studiis conquirevit, uti eidem Varroni narrat *epist. 6 dicti libri*. Hirtium denique et Dolabellam dicendi discipulos habuit, qui apud eum declamarent; *epist. 16. ejusdem libri*, aliisque studiosis philosophiae juvenibus vacavit, quorum ex consuetudine (erant enim nobilissimi et primi,) potentiam paravit denuo in civitate prope summam, uti auctor est PLUTARCHVS in *vita M. Ciceronis p. m. 881*. Hoc amplius patet ex *epist. 18. lib. VIII*, ubi se ludum quasi habuisse ait in Tusculano, postquam Scipio et Afranius in bello Africano perierant, et Cato sibi ipsi mortem consciverat. Scipionem vero Caesar
initio

initio mensis aprilis vicit, et idem non diu post, cum Hispaniam peteret, a Sitio circumventus periit: quae omnia gesta sunt dicto anno 1500 VII. Haec si compares cum illis, quae CICERO initio *partitionum* scripsit: *Otium autem primum et summum est, quoniam aliquando Roma exeundi potestas data est*; confectam esse puto temporis rationem, quo libellum ediderit, videlicet quum annum aetatis ageret primum supra sexagesimum. Haec conjectura robur aliquod accipit ex eo, quod libellus iste in gratiam filii scriptus est, antequam Athenas hic abiret studiorum causa. Athenas vero missus est non diu post obitum sororis, Tulliolar, quae ex vita migravit sub initium A. V. C. 1500 VIII, quo tempore Cicero filius undeviginti annorum erat, utpote natus L. Iulio Caesare et C. Martio Figulo Coss. A. V. C. 1500 LXXXVIII, quo pater designatus consul fuit. Post Tulliolar mortem scriptas non esse partitiones, satis liquet, cum dolore ex filiae dilectissimae obitu nimium angeretur, aegritudinisque aliquam levationem in philosophiae studiis quaereret, in quibus maximam anni partem consumebat. Deinde haec filii institutio in arte, vel potius repetitio eorum, quae jam audiisse filius dicitur, prius fieri nequit, quam per aetatem, discendi praecepta graece didicisset, quae erat tum apud Romanos discendi ratio. Quod si vitae rationes Marci filii inire placet, apparebit, eum ante aetatis annum septimum et decimum tantos in literis profectus facere non potuisse, ut reconditae artis
ido-

idoneus esset auditor. Reliquum ergo est, ut intermedio tempore, h. e. Iulio III. et Lepido Coss. quo pater aetatis annos sexaginta unum numerabat, et filius annorum erat XVIII, liber fuerit compositus.

In hac quoque sententia SEBAST. CORRADVM, virum doctissimum, fuisse video: cujus quidem liber, *Quaestura* inscriptus, et Bononiae apud Anselmum Giaccarellum A. 1555. f. 8. typis descriptus, cum ista scriberem, ad manus non erat. Ejus dein copiam nactus ex regio librorum thesauro Guelpherbytano, verba CORRADI, eo quod corroborare videbantur opinionem nostram, hic adscribenda esse duxi: *Quo tempore, inquit, Caesar Africum bellum gessit, Cicero partitiones oratorias, et Brutum scripsit. Et de Bruto quidem nos in Bruto diximus: sed de partitionibus oratoriis, quia dubitari posse videmus, aliquid dicendum videtur: quamvis nihil habeamus, quod pro certo possimus affirmare. Quare conjectura nobis est utendum ea: videri nobis eas ante scriptas fuisse, quam Cicero filius Athenis Cal. Apr. C. Caesare, Q. Maximo (alii C. Fabium Maximum appellatum, et consulem suffectum fuisse annotant,) Consulibus, ut supra dictum est, mitteretur, nam praesens in eo dialogo cum patre ruri loquitur. Porro dialogus ille vix inter Tulliae mortem, et Ciceronis filii profectionem videri potest institutus, quum pater eo tempore sic filiam lugeret, ut de rebus bisce nihil aut parum cogitaret. Quin ex epistolis ad Atticum cognoscimus, eo tempore patrem ruri, et in solitudine, filium Romae fuisse. Sequitur igitur, ut*
pute-

putemus, eos ante Tulliae mortem de rebus illis inter se locutos fuisse. Atque ipsum inter bellum Africum et Hispaniense factum fuisse crederemus, nisi sciremus, et tempus illud brevius, et Ciceronem occupationem fuisse, quam ut tam multa complecti potuerit, quam multa nos infra dicemus. Africi vero belli tempore magis otiosus fuit, ut in ipsis partitionibus se tum fuisse demonstrat, et rus interdum, ut in Tusculanum, se conferebat, ut in principio libri duodecimi ad Atticum docet: quamvis longius abire non auderet, ut ad Varronem scribit. Tunc etiam Cicero filius annum decimum octavum agebat ita, ut ea posset quaerere; quod antea fortasse facere non potuisset. Africo certe bello finito, pro M. Marcello, et pro Q. Ligario dixit: Brutum, quem prius, ut opinor, inchoaverat, absolvit: Catonem, Oratorem, et libellum de optimo genere oratorum scripsit, atque Demosthenis et Aeschinis duas nobilissimas orationes inter se contrarias convertit. Tum Tullia, sicut ante diximus, Hispaniensis belli tempore mortua, se ipse per literas est consolatus; quem librum de luctu minuendo, vel consolationis inscripsit. Haec CORRADVS hactenus.

De inscriptione, cur *partitiones* denominaverit, non unam omnes fovere opinionem, perspicio. Quidam denominandi rationem eam esse autumant, quod partes, h. e. membra rationis dicendi, non autem formae enumerentur. Formarum enim et generum est divisio, membrorum et totius, *partitio*, uti post PLATONEM, docuit CI-

B

CERO

CERO in *Topicis*, *Formas*, inquit, qui putat idem esse quod partes, confundit artem, et similitudine quadam conturbatas, non satis acule, quae sunt discernenda, distinguit. Si, quae illi dicunt, in se perpendimus, verissima eos dicere, in confesso est: neque tamen satis intelligo, quid ad rem ista faciant, cum certa denominationis ratio nondum appareat. Nam διαίρεσις vox graeca, cui apud Latinos modo *divisio*, modo *partitio* respondet, pro quacunque discriminatione differentiarumque adnotatione, eorumque capitum, quae ad rem constituendam pertinent et referuntur, a praestantissimis auctoribus adhibetur. Exemplum hujus significationis ex THEOPHRASTO affert GVIL. BVDAEVS *comment. lingu. Gr. p. m. 827*. Deinde in hoc libello non partes tantum, sed et formas, itemque capita quaestionum enumerantur. IOACH. CAMERARIUS in *comment. in partit. Ciceronis*, rem omnem a pag. 89. ad p. 97. fuse et suo more, i. e. eruditissime, exposuit, scribens: Sunt autem διαίρεσις in hac arte aut generis in formas, ut, quaestionum alias esse definitas, alias infinitas: aut totius in partes, ut orationis partes esse 4 seu 5; aut rationis et conditionis in enumerandis capitibus, ut, verbi causa, tractandi quaestionem, quae sunt διαίρεσις ζητημάτων εἰς κεφάλαια, κατὰ τὴν ἐκάστων στάσιν, id est, *divisio quaestionum in sua capita, ut vestigentur loci argumentorum, secundum cuiusque quaestionis statum, quod inventionis est opus: secundum haec enim fere differentiae et distinctiones reperiuntur in omnibus,*
de

de quibus *via et ratione disputatur*. Atque has distributiones in doctrina artium usurpari omnes, necesse est, quae communi verbo partitionum a Cicero appellatae fuerunt: qui quidem etiam a partiendo, hoc est, totum in partes suas distribuendo orditur. Atque haec postrema denominationis ratio potior videtur Io. STURMIO, in *partit. orat. Ciceronis dial. I. p. 2*, ubi illam desumptam esse, ait, a docendi ratione *διαλεκτικῇ καὶ ὀριστικῇ*, qua usus totam artem in certos quosdam limites definitamque materiam partiendo tradidit; atque dividendo, partium membrorumque enumerationem instituit. Haec Platoni et Socrati familiaris, et a Galeno tradita docendi ratio, quae ab *ἀναλύσει* diversa est, in quo consistat, brevissime exponit CICERO, sub Crassi persona, *lib. I. de orat. p. m. 180*. Si enim, inquit, aut mihi facere licuerit, quod jam diu cogito, aut alius quispiam, aut me impedito occuparit, aut mortuo effecerit, ut primum omne jus civile in genera digerat, quae perpauca sunt; deinde eorum generum quasi quaedam membra dispertiat; tum propriam cujusque vim definitione declaret; perfectam artem juris civilis habebitis, magis magnam atque uberem, quam difficilem et obscuram.

Non jam disquiram, quid de illa *μεθόδῳ* habendum, et an in docendo probanda sit? Ad dialecticos enim propius pertinet haec quaestio, quam ad rhetores. Probat eam STURMIUS *partit. dialect. lib. III. c. 15*. improbat IAC. ACONTIVS *de methodo p. m. 73. 74*, qui tamen arti, quae jam

constituta sit, scribendae, et ad memoriam atque compendium idoneam esse non negat; quo nomine Ciceronis hic libellus quam maxime commendatur a Camerario, verbis infra recitandis.

Quod dialogo sunt perscriptae partitiones, res est, in quam considerationem intendamus oportet. ἔστι δὲ διάλογος, definiente LAERTIO *lib. III. segm. 48.* λόγος ἐξ ἐρωτήσεως καὶ ἀποκρίσεως συγκείμενος περὶ τινος τῶν φιλοσοφουμένων καὶ πολιτικῶν, μετὰ τῆς πρεπούσης ἡθαποίῃας τῶν παραλαμβανομένων προσώπων, καὶ τῆς κατὰ τὴν λέξιν κατασκευῆς. Hoc docendi genus magnam habuit olim gratiam, et antiquis visum est longe aptissimum ad erudiendos auditores, quos ἐξωτερικούς nominabant, seu eos, quos ad interiora disciplinae cognoscenda non admittebant. Nam ex responsione, quae dari potest ad ejusmodi interrogationem, sub qua contradictio latet, sive ajas, sive neges, probabilis tantum conficitur ratiocinatio, non certa aut demonstrativa. Nam ad demonstrationem interrogationes esse ineptas, ARISTOTELES pronuntiat in *primo priorum analyticorum cap. I*: οὐ γὰρ ἐρωτᾷ, ἀλλὰ λαμβάνει ὁ ἀποδεικνύων. et in *primo posteriorum cap. II*: ἀποδεικνύοντα γὰρ οὐκ ἔστιν ἐρωτᾶν, eo quod demonstratio sumat alteram contradictionis partem, cum interrogatio ipsam contradictionem implicet. Sub ista vero dialogorum classe locum non habent, de quibus loquimur, partitiones. Praeterea Aristoteles ponit alterum interrogationis genus ἐπιστημονικῆς, quae ad scientiam parandam et corroborandam idonea est; atque haec versatur non tantum circa
res

res et materiam, quae vera sit, certa et necessaria, et sua cujusque scientiae; sed et ipse interrogationis modus a priori abit: haec enim sciendi et docendi causa instituta quaestio, non continet contradictionem; sed tantum contradictionis alteram partem, quae est vel affirmatio, vel negatio: qua de re philosophi uberius et accuratius disquirere solent. Conferri meretur OCTAVIANVS FERRARIVS libro eruditissimo *de sermonib. exotericis* p. m. 199. *seqq.*

Ex iis, quae adhuc persecutus sum, conficitur, Ciceroni propositum fuisse, hoc libro morem non Aristotelium, sed Platonium imitari; id quod amplius cognoscitur ex eo, quod prooemium, ab ipsis sermonibus separatum, non praemisit; sed filium ita exordientem induxit, ut, dum aditum patefacit ad rem, differendi occasionem suggerere videretur, cujusmodi principia *καταστατικά* vocantur. Nam Aristoteles, teste Tullio nostro, prooemiis perpetua oratione, quali utuntur prologi Terentiani, usus est in dialogis; quos omnes fuisse *ἐξωτερικούς*, aliunde constat: at Platonis colloquia *ἀνευ προοιμίου* simul cum ipso sermone personarum inchoantur.

Habet et illud dubitationem, cur filio puero interrogandi partes dederit? quas, cum sint difficillimae, Socrati sapientissimo a Platone plerumque datas esse novimus. Nemo enim, quod nescit, interrogare potest via certa, certoque modo, apte et concinne. Illi vero STURMIVS, nunquam sine laude nominandus, occurrit: *Sunt quaedam*, inqui-

ens, quae adolescentulos ex senibus sciscitari decet, si terminatum quaerendi modum habeant; deinde saepius, quae didicimus, sciscitari ab illis licet, quibus nos charos esse sentiemus. Dum ergo Cicero filius ex parente quaerit, discendi causa; et parens, utpote peritior, potiores dicendi partes sibi sumit, id quod Tullio tum propter aetatem et dignitatem, tum propter doctrinam et prudentiam, quam maxime conveniebat: hoc ad orationem moratam et ad decorum pertinet, et ingenium dicentis, etiam cum aliqua morum imitatione, exprimit.

In eo igitur haesisse nollem virum quendam alias acutissimum, qui dialogum esse imitationem, omnemque, quae mores habeat oratio, imitationi esse conjunctam negat; vim verbi *imitationis* eam esse persuasus, ut alius sit, qui loquatur; alius, quem voce et gestu referat. Decorum orationis vel in rebus consistit, vel ad personas refertur. Non injuria igitur, separandum nonnunquam esse decorum ab imitatione, censet. Sed in eo fallitur, dum imitationem non esse, nisi inter duos, eosque corpore, non solo affectu diversos statuit. Rhetorum haec est doctrina, oratorem saepissime mores ejus, quem defendit, vel adversarii, vel aliorum hominum, congruenter proferre; nec raro etiam suos monstrare, et oratione exprimere. Nam ~~et~~ personarum, et imitatio, non tam vitae, quam orationis sunt. hac si refert sensa animi orator, certa quadam ratione affecti: quid hoc est aliud, quam imitari? Itaque licet Cicero in hoc dialogo ex sua persona loquatur, et

et alium externum non imitetur; imitatur tamen parentem, filii amantiſſimum: deinde et filium re-
praefentat, diſcendi cupidiffimum, et modeſtum:
eaeque imitationis laude non concedit Platoni, qui
morata oratione uſus, collocutorum mores accurate
expreſſit cum imitatione. De Ariſtotele pronuntia-
re non ſuſtineo, quem morata in dialogis oratione
minime uſum eſſe, perhibet BASILIVS: illius enim
libri ἐξωτερινοὶ aetatem non tulerunt.

Porro in his partitionibus ſermo eſt inter duos:
fieri enim poteſt, ut in dialogo, duorum tantum, quod
grammatici volunt, ſermo referatur; neque neces-
ſe ſit, ut plures inter ſe confabulentur. Secus vi-
ſum eſt magno SCALIGERO *poëtices lib. I. c. 3.*
Plato certe, qui primus introduxiſſe, h. e. expoli-
viſſe, dialogos dicitur LAERTIO, Ariſtoteles item,
Athenaeus, Lucianus, qui eos ad momicam laſci-
viam detorſit, colloquendi partes dederunt nunc
duobus tantum, nunc pluribus; ut taceam Era-
ſmum, Sturmium, et qui noſtro aevo propiores,
hoc ſcribendi genere delectati ſunt, eundemque
omnes morem atque conſuetudinem tenuerunt. Qui
plura de artificio dialogorum noſſe, et plenius de
iisdem iudicium ferre deſiderat, eum plura et ſo-
lidiora docebit toties jam laudatus Argentinenſi-
um rhetor, STURMIUS, vir praefantia eruditione
et iudicio, *partit. dialect. lib. 4, cap. 18*, quem li-
brum qui norunt, magni omnino faciunt. add.
CAR. SIGONIVS peculiari libro *de dialogo*; et
VOSSIUS *inſtitut. orat. lib. VI. cap. 5, n. 5.*

Quod

Quod ad argumentum hujus dialogi attinet, ita tenendum est, integram dicendi doctrinam mira brevitate hic exponi: id quod cum non satis expenderet RENATUS RAPINVS, philosophus et criticus summus, in topicis, partitionibus, libris de inventione et ad Herennium, particulam tantum artis contineri asserit, in *praefatione*, praemissa libro, cui titulum praescripsit: *Reflexions sur l'éloquence*; notatus ideo GIBERTO in libro, Gallica lingua inscripto: *Jugemens des savans sur les auteurs, qui ont traité de la rhétorique, T. I. p. 381.* Et recte quidem: nam Cicero filius ex parente quaerit non de parte una alterave, sed de omni doctrina dicendi, in quot partes sit distribuenda? Sane brevi hoc libello Tullius congeffit omne id, quod tironi artis, scitu est necessarium, nihilque omisit eorum, quae tum ipse alibi fusius, tum Aristoteles, scriptis tradiderunt. Et quamvis rudimenta artis tantum proposuerit, neque intimos quosque recessus repanderit; virili tamen scientiae ita praelusit, doctrinamque omnem compendiaria hac via ita explanavit, ut exactius id fieri non potuerit.

Neque est, cur CYPRIANVS SOAREZ, in *epistola* ad lectorem, praefixa *libris tribus de arte rhetorica*, brevitatem in hoc dialogo, quasi nimis curta sit et justo restrictior ad docendum, reprehendat: *Partitiones oratoriae ita sunt breves, inquit, et concisae, ut multas et magnificas eloquentiae opes constructas et reconditas nimis anguste coarctent.*

Quod

Quod quidem ferendum esse censet laudatus antea GIBERTVS, si exempla solum requirat, quorum ne unum quidem Cicero subjunxit: at si praecepta ipsi manca viderentur, id vero est, quod cum rei veritate consistere nequeat. Anguste satis, fateor, coarctavit doctrinae nobilissimae opes, quae infinita alias amplitudine se diffundunt: sed et illud profiteor, quod coarctatum est, nimia idcirco brevitare laborare, jure non posse coargui. Nimia siquidem brevitates ea demum est, ubi aliquid ad rem spectans desideratur. Eorum vero, quae artem integram strictim absolvunt, nihil omnino in his partitionibus deest. Sane si diligenter in tradendis artibus verboritas omnis fugienda est; uti post alios recte monuit IAC. ACONTIVS *loc. cit. pag. II*; Tullio certe vitio dari nequit, quod filio praeter *indicia fontium* regustanda nihil exposuerit. Nimirum quae, ex aliis disciplinis petita, in hac communiter alte et a capite repetuntur, ea strictim et concise exposuit. Cum enim primum sit in arte, praecepta artis tenere, quae nobis non minus nota, atque in promptu esse debent, quam viginti quatuor literarum, uti STVRMIVS alicubi loquitur; quam apposita ad hunc finem sit brevitates, obscurum esse potest nemini. Ita doctrinam inventionis paucis lineis absolvit: quoniam locorum naturam et indolem explicare, non tam rhetoris est, quam dialectici; quamvis post temporis quoddam intervallum de usu, quem rhetores ex locis capiunt, scripto singulari uberius commentari non neglexerit.

C

Ad.

Adhaec, pleraque istaec praecepta sunt ex eorum genere, quibus, etsi plene non intelligas, tamen scite uti possumus, si praeceptoris industria praeceat, et si consuecamus.

Ceterum communia hujus doctrinae praecepta, quae quidem e media illa Academia floruerunt, ad rem apposite persequitur. Sunt in his partitionibus, verba GIBERTI latine recito, omnia ea lumina, quae genus judiciale illustant tum univérse, tum praecipue, quod ad státus attinet; quorum doctrinam prolíxa verborum multitudine involvit potius Quintilianus, quam evolvit. Nec jure quidquam amplius requiras in genere deliberativo et demonstrativo, cujus índolem, naturam et characterem, tam quod ad stílum, quam quod ad ornatum, accurate satis explicat; quamvis de figuris et verborum ornamentis aut parum praecipiat, aut nihil. Hactenus GIBERTVS.

Praestantissimi hujus viri animus, in quo exquisita doctrina est et prudentia altissima, offenditur illa Academicorum ex PLATONIS *Philebo* derivata de motibus et affectionibus animi doctrina, quam illi cum Stoicis communem habent; et Cicero sequitur, quatuor earum numerans: Gibertus vero, quasi restrictior sit numerus, oratori hanc divisionem non satis accommodatam, et illam Stagiritae alteram huic longe praeferendam esse autumat. At enim vero, cum ille affectionum animi census, qui in scholis receptus est, (Aristoteles enim et Plato definitum earum numerum inire noluere,) naevis
non

non paucis laborare deprehendatur, et nonnulli insigniores, uti pudor, misericordia, aemulatio, invidia, et plures, plane omittantur; vid. acutissimi THOM. VVILLISII libellus *de brutor. anima, exercit. prior. cap. 9.* laude potius, quam reprehensione dignus erit Tullius, quod maluerit genera definita numero indicare, quam lectorem prorsus incertum dimittere. In Zenonis vero schola partes perturbationum nasci dicebantur ex duobus bonis, totidemque malis; quae tamen Stoici non vera mala, non vera bona, sed opinata solum censebant; ut sit *laetitia* praesentium bonorum; *libido*, futurorum; *metus*, malorum futurorum; *aegritudo*, praesentium; uti ipse declarat CICERO *Tuscul. disput. lib. IIII.* Iam sub haec quatuor, cetera omnia cadere, et partes plures esse generum singulorum, a multis, et ab ipso Cicerone est ostensum. Vidit quoque Tullius, quo ingenii erat acumine, quamvis Peripatetici cum Academicis tum in hac parte, tum in aliis, dissentirent, utrosque tamen multa in orationibus benedicendi exempla reliquisse, et illa ipsa, quae subtiliter differenda erant, polite apteque; ea vero, quae requirebant orationem ornatam et gravem, magnifice splendideque dixisse, uti ipse refert *lib. IIII. de finib. n. 5. 6.*

In amplificationis doctrina sequens definitio: *Est igitur amplificatio, gravior quaedam affirmatio, quae motu animorum conciliet in dicendo fidem;* displicet GIBERTO, eo quod amplificatio, secundum illam, nihil aliud docere videatur, quam rem

stilo simplici antehac explanatam, augere stilo magnifico. In eo quo minus assentiar viro doctissimo, ratio est, quoniam amplificatio fere eas sibi ad tractandum actiones sumit, dicente ARISTOTELE *rhetor. lib. 1. cap. 9*, de quibus nulla dubitatio est, et quae nihil aliud postulant, quam ut augeantur et exornentur. Non itaque venit in mentem Tullio, praecipere, ut res, quae sublimi et vehementi dicendi genere amplificanda est, stilo simplici prius explanetur, quam magnifica illa exornatio accedat: sed ut enthymemata aptis verborum luminibus picta, struantur, quae aliquid magnum esse vel parvum demonstrant, uti idem ARISTOTELES habet *rhetor. lib. 2, c. 26, n. 3*. Sunt enim amplificationis duae partes: una verborum, altera rerum, sive sententiarum: utramque Tullius dilucide apteque explicat, docens, et quo loco, et quomodo, ea sit adhibenda, ita ut nihil omnino omittat in expositione hujus doctrinae, quod ad eam pertineat, ipso GIBERTO fatente. Sed cum nihil perturbet, nisi magnum videatur: oratio autem, verbis licet magnificis elata, tumida potius et inepta fit, quam magnifica, nisi rerum pondera eandem attollant; et cum denique non tam verba, quam res, oratione idonea explicatae, fidem concilient: definitioni huic Tullianae nihil omnino deesse, quod addi desideres, apertum est.

Atque nunc demum plenius perfectiusque intelligimus, quare STVRMIUS, Ciceronis partitiones oratorias, ceterorum omnium rhetoricis antehabu-

habuerit, judicans, eas *ex praestantissimis libris esse, quos Cicero postremos de hac arte scripsit, cum ejus oratio maturuisset, et usu, quae ad dicendum discendumque necessaria essent, comperisset.* Praeceptoris doctissimi de hoc libello judicium, sua assensione approbat eodem non minor alumnus, et in munere successor dignissimus, MELCHIOR IVNIUS, cujus in *methodo eloquentiae cap. 5.* haec sunt verba: *Et sane si compendium aliquod rhetoricae quaerimus, non equidem doctissimorum virorum labores improbo, non studium et diligentiam contemno, non parvi eruditionem atque doctrinam facio, non scripta praecleara de studiosorum manibus excutienda atque removenda esse censeo: at interim ita ista legi velim, ne aureolae illae partitiones oratoriae negligantur, in quibus, quae de oratoris vi, oratione et quaestione, fusa sunt et enodate ab aliis dicendi magistris tradita, dilucide atque perspicue Cicero proposuit, idque poetae observavit:*

Quicquid praecipies, esto brevis: ut cito dicta percipiant animi dociles teneantque fideles.

A partitionibus igitur oratoriis initium sumendum esse in dicendi praecipitis Ciceronianis arbitror. Idem sequenti *cap. 6.* repetit, ubi, cum omnia uno legi atque cognosci tempore nec possint, nec debeant, suadet, initium faciendum esse a partitionibus oratoriis, utpote facilioribus et brevioribus: ab his deinde progrediendum, et cum iisdem conjungenda, quae Aristoteles, Hermogenes, ipse Cicero, et reliqui, hac de arte literis confi-

gnarunt. Duumviris hisce adjungo IOACH. CAMERARIUM, alterum post Melanchthonem Germaniae praeceptorem, qui in praefatione ad hunc libellum, *De quo*, ait, *ea est opinio mea, neque quidquam posse pueris ad indicationem eorum, quae ars rhetorica proficitur, exquisitius, neque adultis ad reminiscendum expressius atque distinctius proponi, quam quae in hoc libello a patre cum filio differuntur.* Atque est veri certe simile, non fuisse in his describendis negligentem Ciceronem, cum opera filio daretur, quem illi et unicum et carissimum fuisse, quemque ad decus atque virtutem in studiis optimarum disciplinarum educi magnopere voluisse scimus. Ad perfectionem autem maximam operis, multum etiam momenti attulit aetas, qua annis jam graviore haec Ciceronem composuisse constat. Ita enim accidit, ut non solum peritia diuturni usus omnia redderet exactiora, sed iudicium etiam corroboratum castigaret atque corrigeret quaedam et Graecorum et propriae rationis, quam aliquando secutus fuisset.

Si denique commendationem habet virtus libri, qui frequentis editionis honorem meruit, et multorum industriam provocavit: partitiones profecto oratoriae nec ea laude carent. In variis editionibus conquirendis otium nobis fecit singulare Germaniae ornamentum, IO. ALB. FABRICIUS, quem, praestantis ingenii et industriae vi-
rum, fautorem optimum veneror, in *bibliothecae Latinae lib. I. cap. 8, p. 94*, et in *supplem. p. 106*; unde
de

de commentatorum memoriam repetens, fere sequentes annoto:

Brutus, cum libro de perfecto oratore, topicis, *partitionibus*, et libris de oratore, LEONICENI illustratis commentario, ac de petitione consulatus ad Q. fratrem, et Aeschinis ac Demosthenis orationibus contrariis latine versis, Venetiis 1485. f.

Prostant quoque *partitiones*, Noribergae 1497. fol. et Venetiis 1501. excusae.

Partitiones oratoriae cum topicis et oratore, et cum scholiis GERARDI BVCOLDIANI, Colon. 1531. f. 8v. adjuncta oratione pro Dejotaro, et ex LIVIO oratione Q. Fabii Maximi de P. Scipionis in Africam traiectione.

IO. STURMII in *partitiones oratorias* Ciceronis dialogi III, Argentorati 1539. Eisdem ab ipso auctore emendatos et auctos, capitibus distinctos, cum singulorum capitum *οικονομία*, et adjectis ejusdem Sturmii libris II de amissa dicendi ratione, recudi fecit Argentorati Theodosius Rihelius f. 8v. nulla anni mentione facta.

GEORGII VALLAE, IAC. LVDOVICI STREBAEI BARTHOL. LATOMI et CHRISTOPHORI HEGENDORPHINI in *partitiones oratorias* commentarii, habentur excusi cum variorum commentariis in universos rhetoricos libros Ciceronis, Basil. 1541 fol.

Libellus Ciceronis de partitione oratoria, totius artis capita complectens, editus, et alicubi explicatione auctus a IOACH. CAMERARIO, Pab. Lipsiae 1544. f. 8v. Par-

Partitiones oratoriae cum tabulis CLAVDII MINOIS, Parisiis 1582. f. 4t.

MARCI ANTONII MAIORAGII commentarius in Tullii partitiones, lucem vidit Venetiis 1587. f. 4ta.

Scripsere quoque in eundem hunc libellum VITVS AMMERBACHIVS et CAELIVS SECVNDVS CVRIO.

CHRISTOPH. HEIDMANNVS, illustris Iuliae quondam facundissimus orator, hujus quoque libelli editionem divulgavit a. 1624. f. 8. luculenta ad amplissimum Ictorum ordinem praefatione per-scripta; adjecto M. ANT. RICCOBONI compendio rhetorices ex Aristotele et Cicerone, atque G. Cassandri tabulis rhetoricis.

ADAMVM SIBERVVM, virum de juventute meritissimum, in partitiones Tullii commentarium emisisse, alicubi annotatum memini: librum ipsum videre non contigit; nec reperio, a M. HENR. AVG. SCHVMACHERO, qui in vita Siberi de scriptis ejusdem copiose differuit, illius mentionem esse factam.

Ex his, quae hactenus fuse disputavi, satis, opinor, liquet, sapientissimo consilio factum esse, ut munificentissimus Iuliae suae conditor, divus IULIVS, Dux Brunsvico-Lunaeburgensis gloriosissimae memoriae, inter alia provide sanxerit, vulgaris rhetorices elementa ex libello, quem vulgo Ciceronis esse putant, ad Herennium, vel ex partitionibus oratoriis esse tradenda, iisdemque absolutis, orationem Ciceronis unam et alteram, vel

ERHARDI REVSCHI
ORATIO,
QVA
VETERVM ELOQVENTIA,
HVIVSQVE
ADDISCENDAE RATIO,
AB
IISDEM DICENDI MAGISTRIS TRADITA,
COMMENDATUR,
CVM
ELOQVENTIAE ET PHILOGIAE LATINAE
PROFESSORIS PVBLICI ORDINARII
MVNVS SVSCIPERET,
HELMAESTADII IN IVLEO MAIORI
IN FREQVENTI PANEGYRI
A. D. XIII SEPTEMBRIS A. R. S. cIdIdccXXIII
DICTA,

THE JOURNAL OF

THE

AMERICAN MEDICAL ASSOCIATION

OF THE

AMERICAN MEDICAL ASSOCIATION

OF THE

AMERICAN MEDICAL ASSOCIATION

OF THE

AMERICAN MEDICAL ASSOCIATION

OF THE

AMERICAN MEDICAL ASSOCIATION

OF THE

ACADEMIAE IVLIAE
PRORECTOR ET SENATVS
CIVIBVS ACADEMICIS.

CUm loqui popolare sit et plebejum, dicere eruditionis magnae et usus longi, palam agnoscitur, potentem hanc virorum virtutem praeclari esse judicii, genii benigni, et copiosae doctrinae: siquidem puri ac elegantis, sed et perspicui et penetrantis sermonis vis ingens est et robur incomparabile in animos cum populi, tum concionis et coetus cujuscunque. Mens audientium duci et convinci vult argumentis, ut veritatem agnoscat, et quid faciendum sit, intelligat; sed et aures mulceri volunt, ut placeat, qui dicit, et persuadeat, quod agnosci et peragi cupit. Validam hanc orandi artem docent in Academiis eloquentiae professores, ut discant studiosi, in omnibus officiis dicere et scribere graviter, dilucide et ornate. Potentissimis Academiae nostrae Nutriciis placuit, sapienter conservare nativam Academiae hujus gloriam, ex dictione pura, compta, et ad movendum apta, ad exemplum veterum. Decorem ergo in orationis apparatu cum haereditario quodam jure sibi

sibi nostra haec musarum sedes vindicet, augusti
Principes novissime ad nos ablegarunt virum varia
nobili doctrina in orbe literato celebrem, DOMI-
NVM ERHARDVM REVSCHIVM, IVRIS
VTRIVSQUE LICENTIATVM, quem ELOQVENTIAE et
PHILOLOGIAE LATINAE PVBLICVM ORDINARIVM
constituerunt PROFESSOREM, quo characiere et
nos eundem in nostrum ordinem et confessum solenni
ritu nuper introduximus. In eo jam est, pro ardui
officii indole, ut nitidae hujus suae et spectatae pro-
fessionis operam in rerum suarum exordio publica
oratione decore illustret, ut pervideant nostri, orna-
tus avidi, quam aperturus illis sit veterum orato-
rum viam ad dicendi et scribendi sinceritatem.
Cras igitur hora X. in luleo magno in panegyri vos
compellaturus, PRISTINAM ELOQVENTIAM, qua
excellit arte, commendabit, ET IN EA ADDISCENDA
ORDINEM VIAMQUE ILLAM, QVAE VETERVM ET
GRAECORVM ET LATINORVM RATIONI SIT QVAM MA-
XIME CONSENTANEA, CONSERVANDAM ESSE edo-
cebit. Quod cum in desideratos vestros cedat usus,
et in elegantium literarum honorem vergat, adeste
attenti, et vos vestraque studia ornari gaudete.

P. P. in Academia Iulia anno MDCCXXIII. die
XIII. Septembr.

MA-

vel epistolas aliquas luculentiores esse adjungendas. Aequissimae huic voluntati demississimo animi cultu obsecundaturus, muneris a serenissimis ac potentissimis Iuliae suae Nutriciis, Dominis meis clementissimis, habito nupero delectu, mihi indulgentissime assignati, fausta capiam auspicia ab explicatione utilissimi, et a tot tantisque heroibus commendati, libelli Ciceronis de PARTITIONE ORATORIA; eoque animo haec praefari libuit, ut expeditam magis viam ad lectionem illius pararem iis, quibus volupe est, in ista arte se exercere, sine qua reliquae tractari rite, exornari praeclare et decore illustrari nequeunt. In praeceptis dilucidandis brevitatem cum perspicuitate jungam; exempla, ex ipso Tullio maximam partem petita, adferam; usum denique commonstrabo, quem praecepta ista in orationibus tam civilibus, quam sacris, lingua seu Latina, seu Teutonica pronunciandis, hodiernum obtinent; secutus hac in re vestigia praedecessorum, quos viros in hac arte summos, et de eloquentiae studiis immortaliter meritos, celebrant boni doctique omnes, CHRISTOPHORI HEIDMANNI, CHRISTOPHORI SCHRADERI, CASPARIS CORBERI, IUSTI CHRISTOPHORI BOEHMERI, quem theologum et oratorem incomparabilem eximia virtus ad altiorem dignitatis, eumque *reverendissimi Abbatis* gradum, haud ita pridem evexit. Ante vero quam labores hosce adgrediar, pauca praecerpere libet de *ratione legendi*

D

bonos

bonos auctores , cum non raro evenire experientia doceat , ut rectae discendi rationis neglectu multi , qui alias neque ingenio , neque studio , neque diligentia destituuntur , aut serius , aut nunquam , solidae eruditionis copiam sibi acquirant.

Deinde cum exploratum sit omnibus , ignotum nemini , *quousque consuetudo exercitationis non recte celebratur , neque excolitur usus rhetoricus ; eousque nihil oratione politum , nihil elaboratum industria , nihil copia atque varietate ornatum , a nostris exire posse ,* dicente laudatissimo STVRMIO *de amissa dicendi ratione lib. I. cap. 3 ;* illis , qui ex commilitonum nobilissimorum ordine , exercitatione usuque dicendi proficere cupiunt , in arte conficiendi , politaque oratione vestiendi , *enthymemata , ὅπερ ἐστὶ σῶμα καὶ κυριώτατον τῆς πίστεως ,* ut ait ARISTOTELES *rhetor. lib. I. cap. I ,* vel in epistolis conscribendis , vel in orationibus componendis , privatam operam navabo. Quandoquidem autem nihil sine exemplo recte aut docetur aut discitur : exempla tum epistolarum , tum orationum ex ipso Cicerone , aut si malueritis , o mei , ex Demosthene , Isocrate , aliove seu Graeco seu Latino oratore , curate seligam , et pro scopo convenienter non tantum interpretabor , sed ita evolvam , ut de usu praeceptorum aperte constare queat. Porro parare constitui auditoribus , si ita visum fuerit , notitiam praestantissimorum auctorum , qui in disciplinis , ad humanitatem pertinentibus , praeter
reli-

reliquos aliqua laude sunt conspicui. Neque de-
ero voluntari eorum, qui antiquitates Romanas, in-
telligendis veterum scriptis pernecessarias, nosse
cupiunt.

Ceterum optionem do humanissimis commi-
litionibus eligendi, si in aliis eruditionis partibus,
quarum quidem interpretatio mihi est commissa,
studia sua a me juvari velint : et vicissim mea
hac omnibus inserviendi facilitate eam a vobis,
o mei, gratiam me initurum totus confido, ut
frequentes, et constanti alacritate me differentem
de iis rebus, quae humanam utilitatem cum ho-
nestissima voluptate conjunctam habent, cupide
amanterque audire, meum hoc studium vestro
amore magis magisque excitare, iusta denique artis
dicendi optimarumque literarum cognitione re-
pleri velitis. Quantum vestra intersit, his stu-
diis exerceri, divus IVLIVS, princeps sapien-
tissimus, qui, ut posteris ac vobis bene esset, ne-
que curae neque sumptibus pepercit, omniaque in
hanc Academiam ornamenta indulgentissime con-
tulit, vos edoceat, si fortasse tanti herois aucto-
ritate duci, ejusque illustrissimo potius testimonio,
quam alterius, aures praebere malitis. Haec
autem ille de studiis artium liberalium recte in-
stituendis lege XI, quae de stilo agit, injunxit
omnibus ac singulis Iuliae suae alumni, scribens:
*Maxime necessariam et omnium utilissimam studio-
rum partem esse, assiduam et diligentem scribendi et*

dicendi exercitationem, studiosi sciant, qua sola fere consequi his temporibus queant, quicquid ex studiis eximiae utilitatis et laudis parari potest. Itaque stilum, optimum et praestantissimum excitandi ingenia, et recte judicandi ac dicendi opificem et magistrum, assidue acuere et polire, tum vertendis ex una lingua in aliam narrationibus, aliisque locis auctorum illustribus paraphrasi reddendis, tum propriis epistolis et orationibus ad imitationem propositi exempli illustris, et iudicium magistri prudentis et usu periti, componendis; tum carminibus ludendis studeant. Et in hac assiduae tractationis stili ac scriptionis diligentia, omnem studiorum suorum profectum et fructum praecipue positum esse statuunt. Valete, generosae mentes, patriae aliquando decora, familiae ornamenta, atque res vestras ex voto peragite. Scribebam

Helmaestadii in Academia Iulia, m. Septembri

A. R. S. cl̄l̄l̄cccXXIII.

ERHAR.

MAGNIFICE PRORECTOR,
PATRES ACADEMIAE CONSCRIPTI,
CELEBERRIMI OMNIVM DOCTRINARVM
PROFESSORES,

CIVES, HOSPITES, QVOTQVOT ADESTIS, PIETATIS
RELIGIONE, DIGNITATIS SPLENDORE ATQVE
LITERARVM COGNITIONE
CONSPICVI,

*Tuque generosa et florentissima ornatissimorum juvenum corona, spes
patriae, parentum expectatio, saeculi decus, amor et deli-
ciae nostrae.*

CVM ab incunte aetate quandam in lo-
quendo verecundiam naturaliter mihi
inesse sentiam, et pudorem, qui lin-
guam contineat; tum nunc maxime,
ubi ex hoc loco dicendum est, qui eloquentissi-
mis eruditissimisque viris semper patuit, multa
animo obversantur, quae mentem penitus commo-
vent ac perturbant. Sive enim muneris
mandati gravitatem curatius dispiciam; sive co-
gitem, quam mirabilis vestra benevolentia ex-
spectationem de me concitârit; sive perpendam
vires ingenii mei, quas sentio, quam sint exiguae;
sive illas denique cum mediocri dicendi exercita-
tione comparem: ea res omnis, quae alios ad
audendum promptissime excitat, me commonere
potuisset, ut hujus auctoritatem loci contingere ne
auderem. Dum autem haec omnia colligo, ac
praeterea demississima animi veneratione contueor
E ad-

admirabilem ac mirificam plane Serenissimorum illustris Iuliae Nutriciorum erga me clementiam, et summam excellentissimorum utriusque aulae procerum in delectu consensionem mente ac cogitatione amplector ; ita apud me statuo, munus hoc ad bene merendum amplissimum, non sine Numine mihi esse delatum assignatumque ; id quod, cum nemini vestrum obscurum esse intelligam, facile vos adducet, ut cumulate vobis a me satisfactum esse putetis, si, quamvis minus disertum et eloquentem, memorem tamen ac gratum virum me praestare connitar. In eam igitur partem attente circumspiciens, quid potissimum in illustri hoc confessu virorum, hisce literis apprime eruditorum, adferrem, quod doctissimis auribus gratum acceptumque esset ; quandoquidem prima dicentis cura esse debet, ut prodesse studeat ; altera, ut amice, ut attente audiat : animo deinceps mecum reputans, latissimum esse orationis genus, saneque varium, quod ad laudandos viros principes suscipitur, eoque non aliud esse aut uberius ad dicendum, aut utilius civitatibus, aut in quo magis orator in cognitione virtutum vitiorumque versetur : jam fere inclinabat animus, ut verborum luminibus quam possem diligentissime exornarem inclutas virtutes potentissimae domus Guelphicae, quae quoad longissime veteris memoriae recordatio repeti potest, heroum felicissima parens exstitit. Sed quis modus et finis orationi futurus esset ? Tot ac
tanta

tanta virtutum decora in augusta hac gente sunt, tot praeclara meritorum ornamenta, tot facinora pulcherrima, eademque aeternitate dignissima, quae suo collucent fulgore atque illustant usque eo communem hanc hominum civitatem, ut non uni, disertissimo licet Tullio, sed pluribus sufficiant, in quibus collaudandis ingenii nervos intendant, omnesque dicendi vires experiantur. Tandem neque a meis studiis, neque ab hoc loco alienum esse putabam, si, dum gratiae aguntur pro accepto munere, in pristinae eloquentiae commendatione consistam, et in ea addiscenda ordinem viamque illam, quae veterum et Graecorum et Latinorum rationi sit quam maxime consentanea, esse conservandam, breviter ac summatim exponam. Vobis, Auditores, spero, nec grave, nec injucundum erit, me differentem audire de iis rebus, quibus ipsimet antehac cum insigni vestro compendio innutriti estis, hortarique lectissimam hanc commilitonum coronam, qua nihil est ornatius, ad ea studia, quae summorum principum administri, divina mente et consilio praediti, ac diuturno rerum usu exercitati, suo arbitrio comprobant, prima esse ad praesidium, ad dignitatem, ad gloriam civitatis.

Facile agnoscitis, Auditores, eam sive artem, sive disciplinam, sive facultatem, quae eloquentia dicitur, in istarum rerum esse ordine ac censu, quarum, uti et ceterarum artium, tenues admodum sunt ortus, planeque dissimiles praestantissi-

mo nitori, ad quem, posteaquam felicia ceperunt incrementa, temporis decursu devenerunt. Nihil enim unquam lucidissimus hic sol adspexit, quod ipsa statim genitili hora summo perfectionis gradu fuerit absolutum, ita ut nihil deesset, nihil addi aut immutari deberet. Postquam igitur summa ingenia quandam dicendi facilitatem in promptu habere coeperunt, illorum imitatione optimum quemque excitatum esse et erectum, ut eandem laudem certa quadam ratione stabilem tum sibi, tum aliis redderet, et viam monstraret unam, solidam, tutam, perpetuam, per quam facile feliciterque ad eam pertingere liceat, ambiguum non est, neque ea res in dubium venire potest. Qui cum Ennio, qui cum Thucydide vixerunt, nae illi gravi sermone et oratione aperta dilucidaque usi sunt: sed in qua nihil ab arte adscitum, nihil politum; quae, natura atque usu comparata, simplici cultu ac tenui, eoque allium nonnunquam et cepe olente, aratores gaudebant et aucupes. Qui illos proxime sequebantur, elegantiae et munditiae et venustatis studiosi, quam longe ab austera illa Pelasgorum et Aboriginum gravitate disjuncti sunt? Cum enim, iudicio usi, in oratione, et rerum et verborum, quae quasi natura et genere longissime remota erant, ingens animadverterent discrimen, ac praeterea solerter observarent, quid intersit, ut quis magnifice, com-
pte, jucunde, concinne, diffuse, acute, graviter, presse, subtiliter, jejune, sicce, steriliter, dicat;
quam

quam vim habeat ornata dictio ; Tifias, Siculus natione, inventus esse primus dicitur, qui praeceptiones magna conquisitas cura scriberet, atque enodata diligenter exponeret artificia voce persequendi id, quod mente et cogitatione quis commentaretur. Est, rudem fuisse artem a Tifia traditam : at Stagiritae, et reliquis, viam praeivit, itaque communivit, ut in unum hi facilius conducerent, quae a singulis egregie erant excogitata, et praecepta relinquerent, quovis auro pretiosiora, si recte iisdem uti noveris. Ab isto tempore qua arte animos ducebant oratores ? quibus verborum luminibus, quae erant dicenda, pingebant, illustrabant, ut non tam dicere viderentur, quam ostendere ? quo sententiarum acumine, quo pondere, mentem gravioribus distractam cogitationibus, quae ornatae orationis illecebris non trahitur, percellebant, ut ad suam dicentium vocem animos adhiberent, non solum aures admoverent ? Quaeris, summa illa dicendi vis ubi potissimum nata sit ? ubi culta optime et quasi enutrita ? ubi perfecta denique et ad summum perducta ? Athenas tibi nomino. Cultissimam hanc gentem, et facundiae gloria nobilitatam urbem, oratoribus fuisse refertissimam atque ornatissimam, quis ignorat ? Nimirum apud illos eloquens habebatur nemo, nisi qui esset sapientissimus. Omnem quippe vim suam, fatendum est enim, et quos habet nervos eloquentia, a sapientiae gravitate habet. Hanc ab illa separare, quid est aliud, quam artus atque

nervos e corpore humano tollere, verum ex anno? Quo quis est instructior a sacra divinorum eloquiorum notitia; quo excellentior in arte aequi et boni; quo peritior medicinae, salutis hominum quaesitae; quo solertior in perscrutando, quod est in natura varium, reconditum, admirabile; quo scientior regendae reipublicae, antiquitatis exemplorumque; quo denique exercitior in omni et virtutum et literarum studio; eo fere praestantior est in dicendo, eo potentior in animi motibus, qui veluti tenores ac soni quidam scite tangendi sunt et pulsandi. Bonas literas qui animo imbibit solerti ac tenaci, eum consiliis saluberrimis abundare oportet. Nam probatissima consilia non aliunde rectius aut felicius expectaveris, quam a literis. Ea si verbis exquisitissime delectis, apteque inter se junctis, accommodate efferas, confecta res est. Mirari itaque definamus ingentem illum rerum publicarum Graeciae Latiique florem, quum intellexerimus, robusta illa pectora, Demosthenem ac Ciceronem, diutius servasse, quae ruitura erant, et post eorundem fata in pejus abiere. Haec demum est illa copiose loquens sapientia, quam in verborum strepitu inani, et sonora linguae profluentia ne quaesiverim. Miser est, qui praeter sonum nihil affert. Miser est, qui sua vitae institutione atque disciplina contentus, suoque ingenio confusus, alterius opes contemnit. Quemadmodum vero doctrinarum cognitio dicendi facultatem non solum uberiores,

sed

sed et illustriorem facit: ita doctrinae etiam ipsae lumen non habent, nisi claritas accedat orationis. Aeternum duratura Platonis, Theophrasti, et quae horum sunt similia, opera vivunt, celebrantur, effertur; et auctori suo novam indies vitam donant. Volufii annales, et si qui, Bavii ac Maevii, chartam stribligine inquinaverunt, jam diu est, quod deleti fuerint, eorumque opprobria habent hoc praemium, ut turpitudine obscuritate et sordibus suis tegatur: nomini tamen eam ignominiae maculam inusserunt, quam nulla unquam aetas, nulla oblivio auferet. Praeclari itaque ingenii foetus vitam habent ab ea arte, quae verborum curam non negligit, sed, dum hanc profitetur, sapientiae simul arces ingreditur, quas ab ipsa excitatas suo quasi jure excutit, et praestantissima quaeque in rem suam vertit. Arces vero ordinate dispositas, et magnifice exornatas, cum quadam animi voluptate studiose contuemur, earundemque visendarum satietate rarenter capimur; at peraedificatas quidem, sed quibus cultus non est adhibitus, praetercurrimus, et facile ab istis removemus oculos, et nos totos avertimus. Vt rectius, quae dixi, intelligantur, totam causam explicemus oportet, atque ante oculos positam consideremus, ut appareat, quid sit, quod nostra haec aetas seu beatior, seu miserior, priscis illis temporibus videatur? Observatum est viris cordatis, ut mores hominum, ita et linguam, et dicendi genus, non eodem modo, sed varie distingui, et in temporum inclinatione
atque

atque vicissitudine ita commutari, ut orationi facta sint simillima, factis vita. Quos splendor, et apparatus, et luxus, et vita plena atque conferta voluptatibus exsaturat, excelsius fere magnificentiusque sentient, et dicent ornatius splendidiusque, etiam cum quadam immoderatione verborum. Humiliter loqui, et sicce, et jejune, et aspere, rudi sermone, animadvertas, qui cultus et munditiae expertes, omnium rerum tenuitate contenti, vitam parce ac duriter agunt, omittunt et negligunt cetera. Qui autem vitae genus moderatum sequuntur, et ad certam rationis normam dirigunt, procul ab ambitione, a luxu remotum, et a tristiori cultu alienum; in dicendo etiam continentiores sunt, neque ad tumorem, neque ad pompam, et magnificam libertatem adsurgunt, neque obsoletiore orationem adferunt. Vnde mirandum non est magnopere, dicendi rationem, et eloquentiam, quae in se una est, in formas adeo varias se commutasse, pro varia nempe hominum, a quibus culta est, indole et habitu. Omnes quidem, quod est optimum et perfectissimum, appetere sibi videntur; pauci vero idem assequuntur, et qui, quod verum est, quadam ingenii felicitate assecuti sunt, ejus usum, postquam traditum est, diu retinere nequeunt. Tanta est rerum homini cognatarum vicissitudo! tanta ingeniorum, licet ad omnia excellentium, imbecillitas! Accedit, quod illud ingenii acumen, illa celeritas ad intelligendum, qua per adolescentiam praediti, non ea semper ratione fovetur.

vetur, quae plana est, certa, brevis, aperta; sed vaga potius multitudine et obscura prolixitate frequentius debilitantur ingenia. Si, quoad longissime mens potest respicere spatium praeteriti temporis, recordamur atque memoria repetimus, qua via, quo studio, ad honoris aedem grassati sint mortales; si porro dispicimus, quae minus aspera et confragosa, minus difficilis, et anfractibus interrupta quam minimis: Socrates hanc Graeciae felicitatem e caelo devocasse apparet: ejus quippe aetas, et quae proxime eandem secuta est, solida hac praestantia fuit commendabilis praeter ceteras, ad quas eadem postea fuit transfusa. Naturam, omnium rerum matrem fecundam, quas habet ubertatis vires amplissimas, tunc collegisse diceres, ut, quos unquam vidit terrarum orbis, aut visurus est, oratores perfectissimos eniteretur, Demosthenem atque Isocratem, post cujus auditores, eorumque discipulos, nihil quidquam clarum in oratoribus fuit; adeo ut horum partu ea quasi effoeta videretur. Atque tum maxime ad eam eloquentia evecta est dignitatem, ut dominaretur integris nationibus, Graeciae cumprimis universae. Cum enim populi tum maxima esset potestas, adeo ut penes ipsum fuerit rerum gerendarum arbitrium: causa nulla, quae esset gravior, de diis, de sacris, sacrorumque ministris, de magistratibus, de pace, de bello, de vita, de fama, de bonis, de libertate, agitabatur, sine populi suffragio. Hinc paene
F quo-

quotidianae oratorum sententiae audiebantur in senatu, in iudiciis, in fori concione frequentissima, inter tribules denique, et semper aliquid novi ad populum ferebatur: praeter illos vero, qui ipsum ducere possent quam artificiosissime, in aliquo numero habebatur nemo. Publica hac laude quantum in maximo quoque ingenio aemulationem excitatam putabimus? hanc enim ingenia omnibus horis aluisse mirifice, et ingentia artibus incrementa dedisse, novimus. Multum igitur operae posuisse censendus est optimus quisque in exercitationibus commentationibusque, ut dicendi illam vim magis magisque excitaret, amplificarer. Videbant enim quotidie, plausum dari nonnisi illis, qui optime dicerent; nec aliam ad honores grassandi viam esse expeditiorem, dicendi facultate. Quid loquar imagines, et titulos, et statuas, quibus honoribus, et ornamentis, et facultatibus, refertas domos eorum vidit Graecia, qui se ab ineunte adolescentia caussis forensibus et oratorio studio dederunt? Quid alimenta in prytaneo memorem? quid coronas, quarum gerendarum jus eximiis tantum oratoribus, ac reipublicae probatissimis permittebatur, ut non immerito Demosthenes nulla re alia potius gloriaretur, quam quod ea corona donatus fuerit, quae suae et innocentiae, et integritatis, et sanctitatis, apud aequos et iniquos, eos qui tunc erant, et qui post multa saecula venturi essent, testis existeret incomparabilis. Hos viros qua tandem ratione ad tantum hoc eloquentiae

tiae fastigium penetrasse existimabimus? num sine arte, sola ingenii excellentia, eo pervenerunt? Id vero esset in re aperta minimeque dubia nugari, quod nemo vir magnus sine aliquo magistro, et doctore, qui viam saltem e longinquo monstraret, unquam exstitit. Num aliis, iisque natura et genere et usu disjunctis ab aliorum more praeceptis imbutos fuisse dicemus? Non puto. Restat, ut fateamur tandem, quo magis floruerit vis dicendi, eo polita magis de arte praecepta, magisque perfecta fuisse. Nihil enim in literas referebant, nisi quod multo usu probatum observassent. Vis, auctores tibi laudem? Quid divinius Platone, etiam tum, cum futuri oratoris mentem et elocutionem informat? Quid sapientius Aristotele? quem industria et sagax Gallorum natio, post infinitos multorum labores, quos in hac arte polienda omni studio atque opera susceperunt, et laudare suis hominibus, et lingua quotidiana atque vernacula legendum tradere, non sunt veriti. Quid? agnovere tandem, Stagiritae comparandum esse neminem? Imo resistere et repugnare contra ipsam veritatem non audent: quin potius clare ac diserte confitentur, Aristotelem in perfectissimo de eloquentia opere de arte artificiosissime praecepisse, illudque unum omnium operibus, quotquot adhuc tradita sunt, longe anteferendum esse. Gratulor, Stagirita, gratulor tibi principatum hujus rei, non a Gallis modo, sed ab omnibus, ipsis etiam obtrectatoribus, demum agnitum! Sit Demetrio nihil subtilius; sit

Dionysio, in quo uno conveniunt oratoria facultas et historia, sit, inquam, Dionysio nihil copiosius ad vitam; sit Hermogene nihil nitidius; nihil Aristide exactius; sublimius nihil Longino: Stagiritae tamen tantum cedunt, quanto solis splendori fulgentissimo luna est inferior. Apud Romanos oratio et perfectum eloquentiae decus sub principe Tullio erupit tanta vi, ut, licet Grajis regendi pariter atque dicendi artes illa ipsa terrarum domina urbs acceptas referre, non recuset; earundem tamen gloriam Latini dehinc illis ferme praeripuerint, eoque perfectionis evexerint eloquentiam, ut dubium jam sit, uter populus, Romanus an Grajus, magis enituerit? uter plures potioresque urbi viros et orbi ista laude insignes dederit? Istud vero admirationem habet maximam, in tanto hoc oratorum numero, quibus vel delectari, vel quos mirari possis, ante Tullii aetatem floruisse paucissimos; pauciores, qui illam secuti sunt. Et quamdiu eloquentia in urbe viguit, artis quoque magistros, ea vidit non contemnendos: numero, si quaeris, pauciores equidem. Nam post Ciceronem, nonnisi Fabium, quo nemo juris erat intelligentior, nominare valeo dicendi hac arte inclutum. Non ego de laude, Curio Fortunatiano, Mario Victorino, Sulpitio Victori, Aur. Cassiodoro, Albino Alcuino, et reliquis debita, quidquam detraho: sint disertis, sint prudentes, sint in aeterna gloria; abundant omni praeceptorum genere; ad communem profecto usum et intelligentiam et exercitationem non tantum

tum valent , ut in magnis rhetoribus sint habendi. Igitur non tam hos, quam veteres illos e Graecia Latioque magistros venerabantur, quotquot nostra patrumque memoria dicendi virtute denuo effloruerunt, Trapezuntius, Erasmus, Melanchthon, Sturmius, Iunius, Strebaeus, Riccobonus, Caselius, Vossius, Schraderus, Thilo, Thomafius, Vavaffor, Rapinus, pro quanta nomina! Illos, cum ad artem tot secum attulerint ornamenta, doctrinam de natura et rebus sublimibus, morum item, rationis, historiae, juris universi disciplinas; illos, inquam, putabimus falsa, et quae lubrico aut nullo innitantur fundamento, aliis praecepta scripsisse? genuinae eloquentiae doctores esse negabimus? princeps rei ipsius momentum non attigisse credemus? Oratores ex philosophorum scholis prodiisse constat: et inique feremus, si rhetores argumenta ex illis fontibus derivant in agros suos, dum futurum oratorem instruere satagunt, vel id potius agunt, ut incomptam doctrinarum faciem, et splendidioram reddant, et amabiliorem. Veteres bene ac sapienter sanxerunt, ad eloquentiae culturam, quae in rhetorum scholis suscipitur, idoneum esse neminem, nisi qui mentem doctrina de moribus, et officio, et pernoscendis cujusque ingenii notis, habet imbutam, et rerum atque verborum copia instructam. Hanc discendi rationem cum immutatam hodie ac perversam videamus, quid caussae est, cur culpaе alienae ream faciamus ar-

tem, quae culpa vel minimae suspitione remotissima est? Eloquentiam ab arte dicendi sejungunt: recte quidem, quatenus altera regiam bene discendi viam commonstrant, qua altera incedit magnifice, et non sine apparatu splendidissime deducitur. Quis vero unquam vir prudens et solers se in viam dedit, qui viae conditiones, et signa in eadem posita, non habeat explorata, ut cavere sibi noscat a tramitibus transversim ducentibus, et ne itineribus deviis proficiscatur? quis est, qui viae necessaria non prius comparet, quam eandem ingrediatur? quis toto malit angiporto deerrare, quam recta via proficisci, quam a tot saeculis tritam summus quisque orator incedere non est veritus. Dicere ausim, paucos ad summum pervenisse, eo quod plerique, quibus in adolescentia in ipso artis limine et aditu aliquando subsistere contigit, a via recedant, et ulterius progredi desistant, nedum ut subinde, quod veteribus usitatum erat, ad haec studia redeant. Et nihilo minus antiquum obtinemus, et, si qua forte hominibus insunt vitia, ea rebus ipsis perperam affingimus. Vt ad credendum inducamus alios, eo omnia bene dicendi praecepta referri, ajunt; de eo sollicitum esse neminem, verisne an fictis argumentorum viribus pugnemus. En, quo praeconcepta homines persuasio abripiat! Vt aliorum imbecillitatem illudant, ipsi soli ignorare volunt, quae intelligunt omnes, opus rhetoris utique non esse, ut ad credendum ducat,

ducat, sed ut dispiciat omnia, quae, insita in rebus ipsis, apta inde fluant ad fidem faciendam. In his iudicio utatur oportet, et, quasi armilustrium agens, optima quaeque seligat. Ex omnibus si qua appareant falsa, quaeve ad maleficium inducant, tantum abest, ut virum bonum, orator enim nemo est, nisi idem sit vir bonus, firmamentis ruinosis ad persuadendum niti arbitremur, ut potius cavere doceat a pestilenti illorum veneno, si qui forte alii justo dicendi artificio injuste abutantur. Negant illi, argumentorum, quibus oratione fit fides, tria esse genera; unum, quod positum est in moribus dicentis; alterum, quod in eo, ut certa quadam ratione, certoque modo, afficiatur auditor; tertium, quod in ipsa oratione consistit, ut aut demonstret, aut demonstrare videatur. Quae ita explicate et perspicue praeceperunt Aristoteles et Antonius, novi illi rhetores non modo permiscent, sed etiam turbant, dum praeter ea, quae certa, et quae probabilia, non aliud argumentorum genus reliquum faciunt. Fallor: ea si rhetoribus relinquerent, videri sibi possent nimium divites. Iam vero quoniam verba sunt notae cogitationum, uti haec rerum esse signa intelliguntur: res autem animo ac mente concipere, alterius est disciplinae opus: omnem hinc verborum curam huic transcribere non verentur; quandoquidem, cogitationum ubertate sublata, verba quoque deficient; et argumenta, quae rhetores et oratores sibi tractanda

da sumunt, nulla ratione differre dictitant ab illis, quae vera et falsa dijudicandi ars edocet. Miseret hominum, in tenebricosum veluti chaos denuo conjicientium, quae veteres multo labore, et acri judicio, a se invicem secreta illuminarunt egregie, et quorum fines distinctos esse voluerunt. Eos cum emendare nequeat virorum in omni arte exercitatissimorum, non dicam auctoritas, sed solidior et accurata doctrina, libris ferme infinitis dilucide perscripta, firmiterque corroborata; quid spei tandem superest, ut aliquando in viam revocentur? Deinde memoriae subsidia, quos locos nominamus, repudiant et explodunt, scilicet ut eorum, quae rebus insunt, difficilis foret aut nulla recordatio. Nemo enim quisquam est tam firma promptaque memoria, ut his veluti signis ac notis non excitandus sit interdum, et commonendus de iis, quae in oblivionem adducta, paene effluxissent. Vt taceam, reperiri non paucos, qui ab hac arte vacui, rerum ordinem, quem illa exserto quasi digito indicat, misere pervertunt, ut satis appareat, illos quasi caecos huc illuc errare, et nescire, quid dicant, et quam bene maleve dicant. Caussarum genera, quae rationibus reipublicae tum Atheniensium, tum Romanorum, unice accommodata ipsis videntur, pro supervacaneis et inutilibus habent, planeque rejiciunt, quod omnis rerum status nostris moribus sit immutatus: nec vident, homines esse homines, quos vel blandiendo et laude delectare atque duci, vel pun-

pungendo et vituperio commonere oportet ac propelli ad ea peragenda, quae honesta sunt, quae sua sponte, nullis admonitionibus provocati, peragere debuissent: non vident, commodis alios, alios incommodis propositis tangi, apud iudices postulari quotidie, illisque probari id, de quo agitur, factum esse aut non esse, iustum aut iniustum, magnum aut parvum esse. Quod enim ad generis universi vim et naturam refertur, id a singulorum natura nullo modo potest discrepare. Porro quid attinet, tricari in numero partium, quae orationem constituent? senarium exterminatum cupiunt illi, tres tantum partes admittunt ut necessarias, exordium, propositionem cum ejus explicatione, et epilogum. At cum perspicuum sit, neque cujusquam orationem desideret, exordium et epilogum, quae duae partes ad movendum adhibentur, nonnunquam a toto orationis corpore abesse: nonne rectius omnino fecissent orationis unicam tantum partem, propositionem cum ejus explicatione? duas enim aut quatuor nominare verentur, ne Aristotelici videantur, aut Ciceroniani. Verba, ajunt, nemo docet, uti in cogitationes apte quadrare, et rebus congruenter convenienterque respondere debeant. Nunquamne auribus perceperunt, in eo sitam esse vim atque efficaciam oratoris, ut verba seligat rebus apta, animis flectendis idonea, ut dilucide dicat, breviter, probabiliter, concinne, illuminate, suaviter? Pleni sunt ejusmodi praeceptorum libri, quibus ars dicendi comprehenditur; plena schola-

G

rum

rum atria; ut copia eorundem cumulatione potius laborare videamur, quam ut de iisdem, tanquam parca manu traditis, justam conquerendi causam habeamus. Quin imo istud dolendum est, esse adeo paucos, qui se rhetoribus poliendos tradant. Haec enim omnis ars, id quod a multis jam dictum est, nonnisi multa industria, ingenti studio, longo usu et quotidiana exercitatione, quae iudicium excitet, bene feliciterque comparatur. Denique ut liberales esse videantur, postquam ceteris rebus omnibus rhetoras exuere, iniquo admodum conatu, studuerunt, verba ipsis reliqua faciunt. Illi si se novos venisse putant, egregius bonis viris error objicitur. Nec inopinata, nec recens de rebus quaestio est, posteaquam Plato, Aristoteles, Strabo, Tullius, hoc cum maxime testificati sunt, rhetoricam esse facultatem sermonis parandi. Sed iidem, qui praecipuam oratorum curam esse dixerunt ac rhetorum, res verbis temperare, immensa oratione palam ac diserte pariter dixerunt, id quod omnes ultro agnoscunt, ex rerum cognitione efflorescere ac redundare orationem, nec quenquam oratoris nomen tueri posse, nisi qui omnium artium ac disciplinarum notitia excellat, eandemque ad dicendum afferat. Pandora ea pyxis est, unde omne malum, quid enim pejus est, barbarie infusari? in orbem literatum dimanavit. Errant profecto, errant, qui, quos vetus illa Graecia, quos Latium tulit, viros eloquentissimos, artisque callidissimos, sola vocum scite

scite tractandarum peritia se extulisse, sibi et aliis persuadere perperam conantur. Non vis nuda dicendi, sed rerum absconditarum cognitio, Carneadem, Romanos alloquentem, fecit admirabilem. Nec alia res famae L. Caelii Antipatri magis obfuit, quam quod plus operae impendit, ut disertus, quam ut juris scientia abundans videretur: idcirco enim multis est posthabitus. Nunquam hostes pestiferi tantum mali intulerunt reipublicae, quantum perversa quorundam persuasio, rhetorum artem in verbis conformandis unice occupari: cum res rerumque causas ingenio instrui desideret, iudicio perpendi, argumenta invenire, inventa constituere, suo quaeque loco idonee declarare, nimis redundantem ingenii luxuriam exquisitissimo iudicio temperare, nihil temere, nihil sine examine admittere, quod calor impetuosus animo objicit. Vt in domo, sic etiam in disciplinis, pernecessarius est ordo. Illi ipsi vero, qui inventionis, et dispositionis, et elocutionis praecepta, erroris, si possent, coarguere exoptant, postquam omne virus evomere, num quid aliud, quod sit magis concinnum, afferre existimabimus? Vereor, ne in suspicionem veniant, damnari veteres, ne ipsi parum docti videantur. Hei quam diversa, quam extracta, via ad gloriam grassantur homines! Ferendum esset, si quorundam in scholis magistrorum imperitum docendi modum insigniter notarent: at dum artem liberius in crimen vocant, eamque subvertere laborant, id vero ferendum non est.

Audiverat Romae Tullius Molonem, non ignobilem dicendi magistrum, cujus institutione tantum profecerat, ut causas in judicio gravissimas peroraret. Inde Romae partim, partim Athenis, operam dedit sapientibus ex Academia et Epicureorum secta; nec puduit iterum iterumque se exercuisse, in Graecia, in Asia, in Rhodo, tum apud alios ista arte inclutos artifices, tum apud eundem Molonem, ut facultatem confirmaret, quam jam ferre erat consecutus: nec, quod magis est, piguit praetorem populi Romani, in schola declamare. Castigatissimam ergo dictionem, qua nihil magis sollicitum, magis exercitum, dici aut fingi potest, ex quo fonte hauserit, dubitare non possumus. Si Siren Attica, si Lyfias, si Aeschines, si Pericles; quem magnum ex Anaxagorae schola prodiisse oratorem traditum est, si Demosthenes, quem magis reformidabat Philippus Macedo, quam ferocissima Atheniensium tela; sentiebat enim majorem ab illius lingua noxam sibi inferri, quam a militibus armatis, magisque Graeciam defendi, ac firmitus in ejus oratione habere praesidium, quam in armis: si reliqui summo quondam ingenio, opera, gratia, gloria praestantes, iis innutriti institutis, quae ad nos demisere, hanc lucem denuo adspicerent; accusarent inertiam juventutis, quae per inanem calumniam inducta, in otio hebescere et languere mavult, nec auctoritate, nec praemiis ipsorum se excitare patitur, ad ea sequenda, quae ad gloriam sunt maxima. Quaerimus et scrutamur ea diligentius, quae,

quae, omnibus grata et accepta, summo studio expeti novimus : et dicendi artem, quam tot viri non sine maximo suo fructu nobis praeivere, quae gratiam conciliat, et a qua reliquae disciplinae omnes splendorem accipiunt atque lucem, segnius expetemus ? Qui lucta, pugilatu, cursu, saltu, disco, quinquertiones evadere cupiebant, omne vitae spatium iis addiscendis insumpsisse, moleste non ferebant ; et nos gravabimur, exiguam temporis moram humanitatis disciplinae pernoscendae tribuere ? Illis etiam cum vitae et salutis periculo decertare volupe erat : et nos tutissima haec, eaque amica certamina, quae victoriam sine sanguine, sine caede, pollicentur, adire detrectabimus ? Illorum labor tanto studio susceptus, nec ipsorum, nec reipublicae rationibus conducebat : et nos ingentia, quae facundia praestat, commoda parvi ducemus ? Non enim aliud telum est adversus verae pietatis hostes, et reipublicae eversores, et singulorum insidiatores, gravius aut vehementius, oratoria facultate : quam fraudem esse hominum ad perniciem, integritatem ad salutem, omnes confitentur. Athletae coronam expe-
tebant ex apii seu foliis seu semine, ex oleastro, myrto, lauru vel palma contextam, quae longo intervallo amittit viriditatem : et nos ejus gloriae dulcedine non commoveamur, quam nulla unquam oblivio delebit ? Quae enim res clarior ? quae gloriosior ? quae commendatior esse potest memoriae hominum sempiternae ? Eam si oculis cerneremus,

mirabiles sui amores excitaret: quacunque adspicias, jucunda suauitate formosa est; quacunque adeas, dulcis et amabilis. Quid est igitur, quod remorari studia nostra, quod a veterum vestigiis avertere nos valeat? Qui hos dicendo superarit, adhuc inventus est nemo. Illos ergo, qui sunt optimi, ad imitandum proponamus. Si nemo est eorum, quos taedium cepisse videtur priscae sapientiae, qui non idem fateatur, illius se monumentis egregie insigniterque adjutum: si prudentiae est, ipsa potius rerum exempla intueri, quam quae ad eorum imagines expressa et conformata sunt; haec enim longius fere abesse solent ab exemplo: si non alia, certe non meliora, nostris hominibus praecepta comminisci datum est: si iidem hodie, qui olim, suasionis loci sunt; si eadem verborum et sententiarum lumina; si denique sola moris antiqui oblivione ab ista veteri gloria descivimus: agite, o mei, vos enim, commilitones suavissimi, quorum quam maxime interest, mihi nunc estis alloquendi; agite, satisfacere allaboremus aequissimae sapientissimaeque voluntati Clementissimorum Illustris Iuliae Nutriciorum, sequamur alacres, et, quantum licet, presso pede omni diligentia enitamur contingere priscos illos et sentiendi et dicendi artifices; sed ita, ut, quae in rhetorum nostro hoc aevo clarissimorum commentariis perscripta sunt, et a vera antiquorum disciplina non longe absunt, aut quandam illi lucem foenerantur, ne contumaciter aut inhumane praetereamus, nec arroganter rejiciamus.

Nunc

Nunc superest, tot tantisque commodis quum frui liceat DEI O. M. beneficio, et nutu indulgentissimo Serenissimorum Potentissimorumque almae Iuliae Nutriciorum, ut maxime illustris et amplissimae benignitatis magnitudinem grati agnoscamus, et gratias, non quas debemus, sed quas possumus, demississimo animi cultu agamus. Potissimum itaque supplex veneror aeternum Numen, quod, eloquii auctor, in lingua explanatam vocum impressionem dederit, eoque mentis acumine hominem instruxerit, ut laudes ejus luculenter fari sciamus. Tuum est munus, alme DEVS, ut praestantissimis dicendi magistris usus, bonarum literarum cognitionem qualemcunque acquirere: tuum est, ut difficultates, quarum nec parvae, nec modicae, in studiorum meorum itinere omnes moras interponebant, tuo solius praesidio munitus, feliciter superare potuerim. Tuum denique est, nec sine singulari providentiae Tuae nota contigit, ut, cum mihi non amicitia, non consuetudo, non usus intercederet cum quoquam uno harum regionum habitatore, ad hanc, quam tuis nunc auspiciis adgredior, provinciam sim destinatus. Age, pater benignissime, infige altius menti meae, eam demum esse eloquentiam veram ac genuinam, quae ad majestatem tuam ornandam celebrandamque confertur ab illis, qui nulla in re ab religione officii declinant. Porro concedas, rogo, ingenii et corporis vires integras, quibus, te clementer dante ac impertiente, adhuc bene valentibus

tibus usus sum: laboribusque, te duce et auspice susceptis, propitius adspires, quo commilitonum charissimorum pectora, qui thesaurus est doctum inaeſtimabilis, in poſterum quoque poſſideam, ſicque tuo auxilio fretus, utilem ac ſalutarem reipublicae operam navare queam.

Deinde et Vobis, Sereniſſimi ac Potentiſſimi Principes, Iuliae vaeſtrae Nutritores munificentiſſimi, Domini clementiſſimi, gratiae ſunt agendae et habendae, quantas mente concipere poſſum, maximae. Immenſa enim exſtant vaeſtra in bonas literas, et in me immerentem merita, quovis elogio majora. Ea auguſtae Guelphorum genti laus fere propria eſt, quod in praelio et bello, dum armorum gloria et virtute non terras ſolum per Europam, Africam, Aſiam, ſed mare etiam implent, excelſo loco provideant, ut ſuus literis conſtet honos, ſuum decus. Pro vaeſtra humanitate, viris principibus digna, qua omnibus facillimos vos praeberis, permittatis, quaefo, clementiſſime, ut, cum promerita vaeſtra multo illuſtriora eſſe et majora ſentiam, quam ut verbis et oratione aſſequi conſidam, ea nunc quidem venerando ſilentio, admiratione obſtupefactus praeter-eam, et pro perenni potius incolumitate vaeſtra Deo vota faciam.

Rerum omnium dominus ac moderator TE, GEORGI, rex invicte, libertatis publicae ſtator, adſertor, conſervator, ſervet ac tueatur, ut invidorum machinas, inimicorum inſidias, hoſtium tela, provido ſemper conſilio labefactes, deſtruas, et quos
inimi-

inimicissimos esse salutis publicae, omnes boni dolent, recte faciendo, *in recto* enim *decus* esse, optime sapientissimeque statuis, concutias, frangas, vel potius, quae summa est votorum Tuorum, ad tranquillitatem traducas, populum fidelem pace constanti regas, excelsum decus regium, ad quod Tua Te virtus et jus evexit, laeta annorum serie tuearis, felices Henrici III et Cissae, praedecessorum Tuorum, annos, iisdem felicior, aequas aut superes, fata ipsis benigniora habeas, et nonnisi aeterna gloria circumfluens, filio ac nepotibus, virtutum paternarum effigiem simulacrumque servantibus, regnum undique pacatum et tranquillum post plura demum annorum lustra committas.

Te quoque, AVGVSTE VVILHELME, Academiae Iuliae Rector hodie magnificentissime, servet idem ille benignissimus universi hujus parens, salus vitae nostrae; servet Te, patrem patriae indulgentissimum, principem pium, justum, felicem, civium subjectorum amorem et delicias, in quo collectas miramur virtutes, quae cum in majoribus Tuis singulae fulgidissimo splendore eniterent, omnibus admirationem maximam moverunt, omniumque oculos ac mentes ad se attraxerunt. Faxit, majora indies augustae fortunae incrementa capias, auctoritate et potentia, qua in Imperio Romano-Germanico, et apud externos quoque reges, egregie polles, opibus item et armis auctus, semper vigeas, et quemadmodum pietate, justitia, prudentia, ceterisque virtutibus, quibus gloriosissimae me-

H

mo-

moriae avus tuus, AVGVSTVS vere augustus, nomen suum aeternitati intulit, Te supparem veneramus; ita integro sanitatis vigore totidem, aut plures etiam, aetatis annos numeres, quibus ille cunctos sui temporis in Germania principes superavit, ac patriae commodo, ex Tua enim salute nostram pendere persuasi sumus, diu superfis quam felicissime. EXAUDI, DEVS, VOTA MEA, AETATEM AETATI REGIS NON MINVS, QVAM DVCIS, ADIICE, VT EORVNDEN ANNI PERPETVENTVR SAECVLIS!

Denique largiatur Vobis, Patres patriae, fidos ac prudentes rerum gerendarum administros, illorum non dissimiles, qui omnium moderatores consiliorum providentissimi, saluti, et incolumitati, et gloriae principum suorum, et terrarum Brunsvico-Lunaeburgensium utilitatibus, consulunt sapientissime. DEVS vos, patres purpurati, utriusque aulae procures, heroes toga et sago excellentissimi, omni invidia superiores, rebusque humanis diu superstites esse jubeat.

Ad Te, *Magnifice Prorector*, mea se nunc convertit oratio. Tibi cumprimis publice attestor eximium, quod mentem occupat, gaudium, quod, Te inclutam hanc Iuliam moderante, in amplissimam Patrum conscriptorum societatem receptus, primas muneris mandati partes peragere potuerim. Praeclara ingenii Tui laus, quae universo literato orbe percrebuit, me quoque ad Te colendum et observandum mul-

multo ante invitavit ; jam vero , cum Tua haec praesentia humanissimam illam comitatem, qua me adhuc complecti voluisti, mihi perpetuam spondeat, amantissimeque confirmet, penitus toto pectore Tibi me addictum habes. DEVS te quam beatissimum esse velit, et rebus secundissimis utentem constantissime defendat ac tueatur !

Nec minus vestram benevolentiam, *Amplissimi Senatus Academici Patres Conscripti*, erga me toties perspectam, et nunc denuo honorifica vestra praesentia comprobata, fore ut mihi perpetuam esse sinatis, spe certa ac fiducia firmissima erigor, quum vestrum omnium is sensus sit et consensus plane mirificus, ut bonis, quas docere iussus sum, literis non ipsi tantum sapientissima pectora habeatis imbuta, sed et commilitonibus nostris auctores existatis gravissimi, ut pretium eisdem aliquod statuam, et jucundissimo hoc studio, ex quo fructus redundant in omnem vitam, ne se ipsi maximo suo cum detrimento defraudent. Quibus gaudiis me exultasse creditis, quum tot studiorum et conatum benevolos auctores adscriptoresque numerarem ? Existimabam, me ad Chytraeos, Calixtos, Musaeos, Mynsingeros, Borcholtenses, Hahnios, Meibomios, Conringios, Pegelios, Reineccios, Caselios, venisse. Quo minus in me esse sentio, quibus vestris in me meritis respondere valeam ; eo magis in vobis esse intelligo, quae praeclare omnibus commendata intuear, et

ad imitandum mihi proponam. Neque in posterum quidquam mihi erit prius, nihil quidquam antiquius, quam candore, qui ingenuum decet, grataque virtutum vestrarum veneratione, ut placere vobis pergam, observantiam vobis debitam et sincerae amicitiae jura sancte colam, et quicquid officiorum promptitudine valeo, id omne vestris commodis lubens meritoque consecrem. Quod superest, prosperitatem omnigenam, et faustos cumprimis laborum successus, vobis apprecor, supremum vitae auctorem flagitans, ut magno Academiae hujus bono ad feros usque annos vos omnes ac singulos conseruet. Vivite, ut bonae artes vivant. Vivite, ut fera aliquando posteritas vos vixisse glorietur!

Vos denique compello, *Commilitones* generis virtutumque nobilitate ornatissimi, patriae spes, publicae felicitatis pignus, deliciae nostrae. Cognovistis, quos viros praeceuntes habeamus, ut difficile non fuerit, nec grave, suavissimos amoenitatis hortos ingredi, ubi, quicquid est florum, quicquid deliciarum, colligere, et in futuros usus seponere licet. Invitat vos aetas vestra, quae, cum ingenio et memoria valeat, commodissima est, ut dicendi exercitationem cum reliquis artibus ac disciplinis jungatis. Invitat amor noster, qui, quicquid vel optimorum auctorum lectione, vel attenta meditatione, cognitum habemus, id omne vobis parat, vobis dedicat. Invitat patronorum auctoritas, quae omnino pro-
voca-

vocare studia vestra debet, ut abundare cupiatis praeceptis bonarumque artium institutis. Invitat salus vestra, quum haec studia severioribus disciplinis amico nexu copulata, omnium temporum sint, et aetatum, et locorum, nec unquam vestra esse desinant, si semel coeperint. Invitat literarum dulcedo, et dignitas, quae sola, si non hic tantus fructus ostenderetur, vos commonere potest, ut in illis animi remissionem humanissimam ac liberalissimam quaeratis. Apertae sunt fores; viae tritae; nulli anfractus; quod si praeter opinionem in quosdam incurrisse vobis videamini, et ducis et comitis officio fungar. Quicumque sedulam societati hominum aliquando navare operam, et vel ad reipublicae clavum sedere cupitis, vel divina in sacro codice perscripta eloquia populo edifferere; huc adeste, quaeso, frequentes, alacres, constantes; arti addiscendae, quae honesto adfert condimentum, et ad honores viam pandit, aliquod tempus tribuite. Quod ad me attinet, efficiam profecto, ut nec vos studii in eam rem positi, nec me poeniteat consilii. Vestra commoda, mea erunt, in quibus conquiescam; imo et rebus, et utilitatibus, et delectationibus meis quibuscunque, semper erunt potiora et cariora. Adspiret coeptis nostris divina gratia, ut illustri Iuliae gloriosa, vobis salutaria eveniant feliciter!

*Ex legibus ordinis philosophorum illustris
Academiae luliae.*

Lex I de lectionibus

§. V.

Cum autem haec ars (*rhetorica*) a sophistis corrupta sit, dabit operam (*is, qui illam docet,*) ut ingenuitatem, nativamque formam ejus, docte et erudite explicet, perplexis sophistarum nugis nervose refutatis: praecipue autem rhetoricam, quam adfentatoriam calumniose adserunt sophistae, certis et solidis rationibus tuebitur, ac quae Plato in Gorgia, in sophista, in libris de republica, et alibi differit, ubi rhetores pariter atque poëtas civitate pellendos sancita lege constituit, auditorio debita brevitatem et dexteritate explicabit.

* * * * *

Plaudite, Pierides, limatum dicite carmen,
Et nunc sedula opus perface turba tuum.

REVSCHIVS, in cuius regnat facundia lingua,

Et sacra qui Themidos candidiora colit :

Cui praestans virtus, cultae et sapientia mentis,

Dant volitare dehinc docta per ora virum :

Cujus in egregio fixam sibi pectore sedem

Alma diu cepit constituitque fides :

REVSCHIVS instituit musis te chara juvenus,

Vt gravia eloquio jungere jura queas,

Et docet ausonidum celebratas volvere chartas,

Quilibet ut plano tramite carpat iter :

Musae quem genitum Ithēsiis aluere faventes :

Fovisti que tuo, Norica terra, sinu,

Sidere felici venientem mactat honore

Guelphorum illustris Iulia, vota ferens.

Plaudite, Pierides, laetae adspirate canenti,

Vt bona verba pius non minus ipse feram :

Gratulor hos, VIR docte, TIBI laetatus honores :

Vsque TIBI vegeto cuncta serena fluant.

Gratulor et nobis potius, quos imbuis arte,

Quae regit ars homines, quae placet ipsa DEO.

Euge, animo TIBI toto, et magna voce precamur :

Sis hominum alter amor, deliciae que Dei.

*Celeberrimo Viro, ERHARDO REVSCHIO,
Professionem Eloquentiae in Academia Iulia
exordienti, pietatem atque observantiam ita
testari voluit*

HENRICVS ANDREAS KOCH.

Cum quas ornat pulcre, relinqueret oras,
Inclytus Elmiadum doctor, BOEHMERVS; amoenam
Hannoveram tendens, ubi diuum sedelocandus
MOLANVS, cleri praefes, venerabilis Abbas,
Mox deponendos ipsi servabat honores:
Iulia tunc merito, stetit acri fixa dolore,
Tam celeres docti capitis conquesta rapinas.
Non aliter luxit, quam quondam fulmine saevo,
Dejecto Phaethonte, jubar querebatur ademtum
Mundus, et in toto quidquid comprehenditur orbe.
Nunc autem tristis depellit nùbila luctus:
Nam rediere diem spargentia lumina musis,
Dum venit optatus, quem Noris Francica misit,
REVSCHIVS, excultae splendorque decusque Minervae,
REVSCHIVS, in doctis quo non praestantior alter
Commovisse viros blandae moderamine linguae,
Quemque adeo celebrem summae ad fastigia laudis
Fama vehit, totoque facit clarescere Pindo.
Ergo utinam TE quid dignum, VIR maxime, linguae
Concepisse queant, resonent et vocibus ora
Magnificis, et nostra ruat per pectora Phoebus.
Sed mea vel numeris certent si verba Maronis,
Plurima cum linguis essent et pluribus ora:
Non tamen idcirco complecti singula verbis,
Omnia nec laudum percurrere nomina possem.
Tu tamen, o faveas, nostris, VIR docte, Camenis,
Respiciasque bona, mentes TIBI, fronte, dicatas:
Sis bonus ac felix nobis, quo, TE duce, tandem
Optatam liceat studiorum tangere metam.
TE DEVS omnipotens, celsi TE rector olympi,
Protegat, ac duplicet mentis fortisque vigorem.
Rideat usque TIBI vultu fortuna sereno.
Cornicibus surgant semper TVA vota sinistris.

*Academiae Iuliae, de VIRI Amplissimi ac Celeberrimi,
ERHARDI REVSCHII, Professoris Eloquentiae ordi-
narii, auspiciatissimo adventu maximopere gratulatu-
rus, seque IPSIVS propensae voluntati commendaturus,*

scribebat

IOANNES GERARDVS VVAGNER.

